


www.BibleForChildren.org

Matyu 26



Nam butang di
là fa kel i fista Duh
Kaglius salu Dyisas di
tukay banwe Bétani di
gumnè Lasarus, dunan i
to ntékan mdà di fati.
Na nwè Méri i tngà kilu
fangbun dnagit nardo too
mabtas du landè bolan, na
kokan di dad blì Dyisas, na én
ifun dun i wakan. Na langub
i fye bun klamang gumnèla.



Kafnge éń, Dyudas Iskariyot, satu di sfalò lwe gal
mlalò ku Dyisas, salu di dad ulu dad bà di Dwata, du
stulen ku tan kiboan mangkal ku
Dyisas fye kanfèla kenen. Di
kaklingela dun, too ale lehew,
na makang ale mlé filak di
ku Dyudas. Taman mngabal
kenen kfagu mlé ku
Dyisas di agotla.



Na nimenla i kdee gman Dyisas
di dale. Na ditù gufatlagadla
knaanla i Duh Kaglius. Na di
slengla kmaan, nwè Dyisas i fan,
na funa dmasal mlé fye di
Dwata, na snatngaan na blén di
dad gal mlalò kenen, manan,
"Nwèyu ani, na knaanyu du ani
lawehgu."



Kafnge én, nwean i ninum, na
mlé fye di Dwata, na blén di dale,
manan, "Sansinumyu ani, kdeeyu,
du ani litègu falohgu du fye nlifet
Dwata dad salà i dee dad to,
du litègu i kaglut di falami dalan i
fakang Dwata falwà i dad to."




Na man Dyisas di ku Simon Fiter, "E Simon, tambal Satanas du kayean too gamu tnilew du neye ku simto di gamu landè kafaglut di deg. Kabay tadmasal agu ge, Simon, fye là fisan i kafaglutam. Na ku tasamfulê ge di deg, tangalam nawa i dad flane kam." Na man Fiter, "Amu, tagatlagad agu magin ge balù bnilanggù agu demen fnati." Na man Dyisas, "Tulenta ge, Fiter, di là fa kamleet i anuk butang ani, tmulen ge tlu dulê i laam agu dilè."



Na fadlug ale Dyisas
salu di satu tanà dnagit
Gétsémani, na manan di
dad gal mlalò kenen,
"Sudeng gamu dini di
lamgu dmasal ditù."
Na manan, "E Mà, gadègu
landè laam gagan nimò.
Taman begam nwè i
kaflayam fangu gnagu ani.
Kabay balù én deg knayè,
toom dnohò i ge knayè."



Taman salu Dyudas ditù, na faginan dademe sundalu
na dademe dad munung i Bong Gumnè Dwata dek dad
ulu dad bà di Dwata na dad Farisi. Mebe ale
dad salò na dad tekla. Na satu di dale,
tniben i lifan i gumdatah dad bà di
Dwata, na masfek i bali
klingen gsen di kwanan.
Kabay man Dyisas,
"Tong nan!" Na
nagotan klinge i
lifan, na fanguléan.



Kmanan ani, kanfèla Dyisas, na nebela kenen salu di
gumnè i gumdatah i dad bà di Dwata. Na mlalò Fiter
dale, bay fawag di fulé.

Kakella ditù mto i dad
mantay i lifoh di gutngà
nasel i gumnè. Na Fiter
fasbool di dad to
sudeng samlibut
i lifoh.



Na déén satu lifan
i gumdatah dad bà
di Dwata, flanek i
to tnibe Fiter i bali
klingen, na manan,
"Ise ge kè i to teengu
gine di kakfè ku Dyisas
di gumule kayu?" Na lêman
malew Fiter, manan, "Ise
deg." Na én nan kakleet i
anuk. Na taman lamwà
kenen na too mngel.




Na kafnge én, i kdee dad ganlal
dad Dyu déén, sdulê ale tadag, na
nebela Dyisas ditù di muna
Gubirnador Filat. Na kaklinge Filat
i manla, smalek kenen, manan,
"Ge kè harì i dad Dyu?"
Na tmimel kenen, manan,
"Tagmanam sa." Na lêman
talù Filat di dad Dyu, du
kayean falwà Dyisas.

Kabay too ale mkit, manla,

"Flansangam kenen di krus!
Flansangam kenen di krus!"




Taman blén kenen di dale du
nlansang di krus. Taman nwèla
Dyisas, na lamwà kenen tmiang
i krusan salu di satu tukay
bulul dnagit Banwe Tulan Ulu.
Na dagit ani di talù Hibru,
dunan Golgota.



Na déén gumlansangla kenen.
Na nun lwe to nlansangla di
krus di safédan, satu gsen di
kwananan, na satu gsen
di ibengan, na
Dyisas di
gutngàla.



Na di fan nan Itu i duh, mbaling kifu di klamang
banwe kel di tngà masol i duh, du talà mneng i duh,
na matngà kasê i bong kurtina safang i sibay i too
mdatah gumangamfù di Dwata
ditù di Bong Gumnean. Na too
falbong Dyisas i taluan,
manan, "E Mà, fagotta ge
i layefgu." Na kmanan
ani, fto i nawan.



Na i duh kfati Dyisas, én duh
kafatlagad dad Dyu i Duh Kaftud.

Na di kasdaf i duh én, nun
satu to dnagit ku Dyosif
mdà di banwe Arimatiya
kayean ku gasilan
nwè laweh Dyisas
du Ibang di là fa
Duh Kaftud. Na
to ani

satu di dad ganlal
gal mukum dad
Dyu, na too kenen
mgafè. Na kenen
satu Dyu too fatan
i kagot Dwata.



Na di flabi én, fangalan nawan salu di
ku Gubirnador Filat du fni laweh
Dyisas. Taman bnayad Dyosif
i safut bukay du nwean
laweh Dyisas mdà di
krus, na labédan
kenen falami safut
én, na fkahan di
satu gulam-bang
tansol di lfidas

di gugdak i bulul.
Kafnge én, flulidan
déén satu bong
batu du nsangan
bà gufusuk i lbang.



Di tmadol duh, dunan i Duh
Kaftud, salu i dad ulu i
dad bà di Dwata na dad
Farisi di ku Filat. Na
manla, "Gafaldammi
nun man i to gal mgaw
atù di là fa mati,
manan, 'Nté k agu
di gat lun duh.'"



"Na taman salu ale di
Ibang Dyisas du
fangagidla. Fankahla i
gafgat di batu sang i
Ibang gudmilèla ku
nun mutik dun. Na
tnagakla déén
dad to munung."



Kafnge i Duh Kaftud di too flafus
Linggu, mdà ale Méri Magdalin na
i satu Méri salu di lbang du
neyela. Na nun bong linol
du nun kasaligan Dwata
fdanà mdà di langit,
na flulidan i bong
batu sang i lbang,
na sudeng kenen
di tahan.

Na i dad to
munung i lbang
tatì ale kankal
mdà di klikòla
kenen, na gambet
ale i dad to mati.



Kabay man i kasaligan di lwe libun,
"Nang gamu likò. Gadègu én
fanngabalyu Dyisas, i
tanlansangla di krus.
Talaan dini du tamték
mdà di fati, gambet i
tagmanan di gamu."



"Salu gamu dini na neyeyu I gufilèla
kenen, na gasil gamu salu di dad
gal mlalò kenen, na tnulenyu
ale tamték kenen mdà di
fati, na tamuna kenen
di gamu salu di Galili.
Ditù guşmiteyu
kenen. Én sa i
tulengu gamu."



Taman gasil mdà i dad libun mdà di lbang
na likò ale, bay too ale lehew. Na sadlu
ale du fye tnulenla i dad gal mlalò
ku Dyisas. Na tatì ale snitong
Dyisas, na manan, "I ktanak
nawa samnagin gamu!" Na
fdadong ale di kenen na
nagotla i dad blian,

na mangamfù ale di kenen.





Kafnge én, fite Dyisas i kton di dad sfalò
satu gal mlalò kenen slengla kmaan. Na tnaluan
ale du kulang i kafaglutla na mgal i ulula, du talà
ale faglut i man dad mite kenen kafngen mték.

Na i Amuito Dyisas, kafnge i manan dale
ani, magket kenen di langit, na sudeng kenen
gsen di kwanan Dwata.



Du Dwata toon kanbong
nawa kdee dad to di tah tanà,
taman blén i sen Tingaan du
fye balù simto faglut di kenen
là malmo di salà, bay nun
nawan landè sen.



Roma 3:23 I dalan gufagu Dwata fye matlu i dad to di kiten, dunan i kafaglutla ku Dyisas Krayst. Landè gusahal i dad to du kdeela slame gamsalà di kenen, na gawag di kdatahan na knayean di dale.

Roma 6:23 I untung i kimò salà dunan fati landè gusenán, bay i blé Dwata landè bayad dunan nawa landè gusenán fagu di ku Krayst Dyisas Amuito.

Hibru 9:27 Na salngad én i dad to, du alò ale sulê magu di fati, na kafnge én nukum ale Dwata.

Ifisus 2:8,9 Du mdà di kablén i kafye di gamu, falwaan gamu mdà di kaflayam landè sen, fagu di kafaglutyu di ku Dyisas Krayst. Ise mdà di gamu gnagan, demen mdà di fye nimòyu, bay alò mdà di blé Dwata landè bayad, du fye landè fakay mdag i kton,



Roma 10:9,10 Na ku tmulen gamu i dad demeyu to, Dyisas i too glut Amu, na ku too gamu faglut nték kenen Dwata mdà di fati, galwà gamu di kaflayam landè gusenàn. Du ku mdà di nawayu too faglut, na ku tmulen gamu i dad demeyu to gablà di kafaglutyu, matlu gamu di kite Dwata, na galwà gamu di kaflayam landè gusenàn.

Dyan 3:16,17 Du Dwata toon kanbong nawa kdee dad to di tah tanà, taman blén i sen Tingaan du fye balù simto faglut di kenen là malmo di salà, bay nun nawan landè sen. Du ise én duen Dwata mdek i Tingaan dini di tah tanà du mlayam i dad to, bay dekan dini du fye falwaan dad to di dad salàla.



1 Dyan 5:11-13 Ani sa i fgadè Dwata di gito, dunan
tabanlén ito nawa landè sen fagu sa di Tingaan Dyisas
Krayst. Taman ku simto masasatu di Tingà Dwata nun
nawan landè sen. Kabay ku simto là masasatu di kenen
landè nawan landè sen. Na smulat agu di gamu dad faglut
di Tingà Dwata, du fye tooyu gadè tanun
nawayu landè sen.



Matyu 26-28; Luk 22-24; Dyan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Blaan, Sarangani Bible (bps) © 2014, Wycliffe Bible
Translators, Inc. All rights reserved.

<https://www.bible.com/bible/1245/MAT.1.ITD>

©2026 Bible for Children, Inc.

www.M1914.org

www.bibleforchildren.org

